

# SAN PEDRO CARTA NYAFYTE FI'JNI

---

## Vite quiwesu u'p-ya' u'jsaty Pedro fi'jni

**1** <sup>1</sup> Andya' Jesucristo jycaajnis Pedro yaasetj. Naa carta's fi'jatstju vite quiwesu u'p-ya' u'jsawe'shtyi, Ponto, Galacia, Capadocia, Asia, Bitinia tyāa quiwesuwe'shtyi. <sup>2</sup> I'cue'shtyi tyjityjwa'ja's Dyus cue'sh Tata' nyafiitey ma'wēne' pjeu'jrra ji'pju' tyā'sa' cytey yuuc. Tyāasac Dyus Espiritu' i'cue'shtyi ewmeejū tyujnderra Jesucristo eegu nuyaate Jesucristorrá's nwēese'cjan. Tyā'wē Dyus pu'chpa'ga āchja' seena' wala wēt mfi'nzewe.

## Na'wēsa's jypa'gaya' ūytjasna fi'nzeni

<sup>3</sup> Āchja' cue'shtyi jype'jsa Jesucristo Tata's wechana tuutje'jega. Tyā' cue'sh ewmeesateva peeygājrra qui' u'se upysa na'wē yuupa'garráac tyā'wē yūu. <sup>4</sup> Tyāa pa'gac ew jii ya'fi'nze', Dyusa' cielute cue'shtyi ūswa'j jyaawni ji'pja' tyā'sa' jypa'ga'nja'w sūjna ūytjasna. Tyā' bagachte yujva ptsumeena sa' suweevameena sa' vituvameena. <sup>5</sup> I'cue'sha' Dyusa's ūuste jypumbamée yaacywa'ja's ji'pji'cue, naa pa'ga tyā' i'cue'shtyi jyaawuuna nmej en ājte i'cue'sh cielute pa'jwa'ja's pjeu'jrra ji'pja' tyā'sa' jypa'gacajn. <sup>6</sup> Tyāa pa'ga i'cue'sha' iiméj wala wechana meswe, macue maa enteya' űuswa'j en ma'wēsava pa'tjeva. <sup>7</sup> Tyāa pa'gatey űuswa'j en tjēysa pa'ja'ty tyā' Dyusa's jypumbamée jwee írráa chjāchja yaacywa'ja's pjeu'jsata', vyyu beja'sva ew zhichcue neeyūcajn ma'wēga ipyte cambrra ya'pjeu'ju' tyā'wēy. Atsa' macue tjēysa űuswa'j en pa'tjeva Dyusa's jypumbamée yaacyni's iviitusame' vyyu bej ptsusaate jytjaacue pa'gasa yuuna. Tyā'wē yūusa' isa wechana jyujtjesa yuune'cue naa quiwete Jesucristo quii ente'. <sup>8</sup> I'cue'sh yafyju yu' Jesucristo's uymeerrava, peeygājrra nwēese'je'i'cue, sa' uymeerrava tyā'sna yajcyrra iiméj seena' wala ūuste wechwecha yaaqui'i'cue. Tyā'wē ūuste iiméj seena' wala zhichcue wēt wēt

yaacyni's pta'shya' ya'āja'tsme'. 9 I'cue'sha' tyā'wē Dyusa's jypumbamée yaacywa'ja's ji'pjupa'ga i'cue'sh ūusa' ewte neeyūuna.

10 Dyus peeygājrra i'cue'shtyi ewte nviitwa'ja's jiyurra pta'shsa nyafii enteywe'sha' wala paapējyina atyajty ewte neeyūuwa'l jīni's. 11 Tyā'wē Dyus Espiritu' tyāawe'shtyi' dyciicjēy caajiyu'cj ewte nviitwa'jsa' wala pytjaa yuurrava tyāa e'su' wala jytujtjesa yuuwa'jsa' jīna. Tyāa pa'gaty Dyusna selpisaawe'sha' jiyu wēe tyā'wē yuuwa'jsa' quimqui sa' bagachqui atsqui'c Dyus Espiritu' tyā'wē pta'shi' sūjna. 12 Tyā'wē paapējyina ūste', Dyusa' tyāawe'shtyi pejca caajiyu'cj tyā'wē pta'shnisa' i'cue'sh jīi meea', vite ensuwe'sh jīia' jīc. Tyā'wē ewte neeyūuwa'l seena' wēt-wēt-sa's Dyus ūscu tyā'sa' angeleswe'sh yujva jwee'írráa wala jiyuvatsa' sūju'ty, tyā'wē seena' zhichcuesa pa'ga.

### Quīj pcal yujva ji'pjmée fi'nzeczajncu Dyusa' pa'ya

13 Tyāa pa'ga ew miijajcywe ma'wē ew fi'nzewa'ja'sva wala jypa'yacy. Dyusa' i'cue'shtyi peeygājrra Jesucristo vyaa ente' ūsya'va' tyā'srráana ūytjasna meswe. 14 Nwēese'jsa luuch na'wē myuuwe. Nyafia' Dyusa's jiimeerra' ma'wēcue peecy ūus yaacyni ewmeesaterráa fi'nze' tyā'wē yūunuwe, 15 wejyva ūusuj jyuca ewmēejū tyuteerra ūuste quīj pcal yujva ji'pjmée mfi'nzewe, tyāa pa'gatey i'cue'shtyi pa'yasa Dyusva quīj pcal yujva ji'pjmeesa' naa pa'ga. 16 Tyajíic Dyus librute na'wē we'we': I'cue'sha' quīj pcal yujva ji'pjmeesa myuuwe, andyva quīj pcal yujva ji'pjmeesatj naa pa'ga jī'c.

17 Miiyajcywe Dyusa' cue'sh Tata' jīna cysusu'i'cue tyā' quim yujtyva nviitmée jyuca pēywa'jsate jiirra', ūucjna mfi'nzewe naa quiwete macue tyach ūtyi fi'nze'tsrrava. 18 Yatsgawe'sh ma'wē ewmée fi'nzete', i'cue'shva tyā'wēy ewmée fi'nzenijū Dyusa' nwe'wec. Sa' i'cue'sha' ew jii i'cue tyā'wē nwe'wepa'ga quīj yujva ya'ducjme' naa quiwete ptsuwa'jsa ūsta' vyuu bej vyuu chijme tyā'wēsa yacjrráa yujva. 19 Naasáa Jesucristo ee yacj yuurráac ducjnisa yuu. Tyā' piishacuē quijte yujva ātsa'meesa ewsa' icjrra pcaltyi yaateya' cambnisa na'wēc yuu. 20 Cristo' tyā'wē yuuwa'cj tyjityjnisa yuu naa quiwe meetey, nava naa ensurráac tyā'wē yuuya' vyaa i'cue'shtyi nwe'weya'. 21 Cristo tyā'wē yūupa'ga i'cue Dyusa's jiyuya' āja. Dyus íic Cristo uuteva ūtyi vitrra tujtje nviit, Dyus yuurráana yajcyna ūytjasna fi'nzeczajn.

22 Áchja' i'cue'sha' Dyus Espiritu pu'chte', isa pta'shni's wēse'jrra', i'cue'sh ūustyi yaate i'cue ūusuj jyuca yajcyrra yacjtjē'jwe'shtyi peeygājya'. Tyā'wē yā'jrra', puuty teeche na'wērraj ya'mpeeygājwe ūusuj jyuca yajcyna. 23 Tyāa pa'gatey i'cue'sha' nasa naa quiwete pcalsa jil'mée, quīj pcal yujva ji'pjmeesa jil'jī'cue yuu. Dyus yuwe bagachte yujva ptsuwa'jsame's wēse'jrra i'cue tyā'wē yuu. Dyus yuwe' bagachte yujva ptsuwa'jsame'. 24 Tyajíic Dyus libru' na'wē pta'shi':

Naa quiwete nasa' jyucaysa scjēwwa'jsarráata'.

Tyāawe'sha' macue seena' wala jiisarrava, jyūtj tash na'wēsarráata'.

Jyūtjva ujn dyte', quiteva wete'c tyā'wēysarráata'.

<sup>25</sup> Nava Dyus yuwe' bagachte yujva psumée nes yuuwa'jsa' jī'c.

Tyāa Dyus yuwe's íc i'cue'shtyi pta'shni yuu.

**2** <sup>1</sup> Tyāa pa'ga ewmée yūuya' yaacyni's jyuca manvijtwe. Īshiinisa, yuwejurráa ew we'werra' ūuste yu' ewmée yaacyni, vitety atseyaacyni, e'sgarráa ewmée nuywe'weni tyā'wēsatyi' nvijtrra, <sup>2</sup> luuch u'se casejsava ma'wēga lechi ewsarrá's jypa'ga', tyā'wēy i'cue'sh ūuste ew cchjāachja'jwa'jsarrá's mpaacuewe. Tyā'wē yūurra Dyus yacj chjāchja fi'nzene'cue ewte neeyūuya'. <sup>3</sup> Tyā'wē myūuwe, cue'shtyi jype'jsa ewsateva ew jiyu dyijrra'.

### Cuet ĩtyisa na'wēsa' Cristo'

<sup>4</sup> Cue'shtyi jype'jsa tashte mutyaawe. Tyā' cuet ĩtyisa na'wēsa'.

Tyā'sa' naa quiwete nasa' ajtsety, nava tyāaíic cuet jytjaacue ewsa Dyus

tyjityjnisa yu'. <sup>5</sup> I'cue'shva cuet ĩtyisa na'wē i'cue naa pa'ga Dyusa'

i'cue'shtyi' tyajy ūswa'j yat na'wēsac vitu', sa' tyā'wērrámée quíj pcal

yujva jī'pjmée tyajy tashte yuurráa selpiina ūswa'jsac vit, tyāa pa'ga tyajy

tashte utyaarra ewsa yuurrá's cytey myuuwe. Jesucristo pu'chte', i'cue'sh

tyā'wē yūuni's Dyusa' jypa'gana. <sup>6</sup> Tyā'sna we'werrac Dyus libroute na'jī':

Yat tyaajwa'j cuet tyjityjnisa iiméj ewsa nviitutstju Sion judiuwe'sh quiwete,

Atsa' tyā'sa' maava jypa'gasa' jypumbasáa yuumeena jī'c.

<sup>7</sup> I'cue'sh ew jiyusa yacj yu' tyāa cueta' iiméj wala ewsa'. Nava

jiyusamée yacja' na'wērrác ya'yu' tyā'wē yūuni's Dyus libroute na'wēc we'we':

Yat tyaajsawe'sha' cueta's ajtserra wātājteva,

E'suyā'ja' tyāaíic tjaacue ewsa yuuna pa'j jī'c.

<sup>8</sup> Vite ajcēl' tyāa cueta'síi we'werra':

Cueta' cyu'chafiljrra pētysarrá' jī'c.

Dyus yuwe's pta'shteve, tyāawe'sha' cytey nwēese'jsame' jypumbasaata', jiyuwa'jsamée ne'ta yu' naa pa'ga.

### Nasa Dyus tyjityjnisa

<sup>9</sup> Nava i'cue'sha' Dyus tyjityjnisa i'cue, tyajy tashte yuurráa selpiina

ūswa'jsa. Dyus cusetewe'shi'cue, quíj pcal yujva jī'pjmeesa. Tyāa pa'ga

Dyus tyacue wala i'cue'shtyi ewte nviitni's pta'shwa'j jī'pji'cue. Tyā'wē

yūucajncu pa'ya, jīimée jypumbana chji'ndyte ūsnijū casejrra zhichcue

eena'te pa'cjan. <sup>10</sup> I'cue'sha' nyafiia' Dyus jīi yu'tsmée i'cue, nava āchja'

Dyus jīi i'cue. Nyafiia' quim yujva peeygāanisamée i'cue yu', nava āchja'

Dyus peeygāanisa i'cue.

### Dyusna selpiina yuurraa mfi'nzewe

<sup>11</sup>Andy yacjtjê'jwe'shtytij neewe'we': I'cue'sha' naa quiwetewe'shmée yã'ji'cue, tyãa pa'ga peecy cacue ewmée yũuya' yaacynityi's nwēese'jnuwe. Tyã'wēmē' ũusa's suwsaata'. <sup>12</sup>Dyusa's jiimeesawe'sh cshavysu wala ew mfi'nzewe. Tyãawe'sha' āchjī yu' wala atsewe'we'ty i'cue'shtyi ewmeesa na'wē. Nava Cristo quīi ente' i'cue'sh ew yũuni's yurra', Dyus luuch yuj yu'ta jīna tuutje'jetyna.

<sup>13</sup>Dyusa's jii yã'jsa' jyuca mwēese'jwe naa quiwete jycaajwa'jsa nviitni ũsta' tyãawe'shtyi, jycaajsa npiitstjē'jsa ma'c yuu, <sup>14</sup>meerra' jycaajsa nuuchsa ma'ty yuu nava jyuca. Tyãawe'sha' Dyus caajnisata' ewmée yũusatyi' castigāyna vite' ew yũusatyi' nwe'wesa. <sup>15</sup>Tyãa pa'gatey Dyusa' i'cue'shtyi' ewcu yũu jytjāasu' vitety, tyã'wē yũurra atsewe'wesaty shuuna' vit-ya'.

<sup>16</sup>Dyus nwe'wenisa yã'jrra', ew mfi'nzewe. Nava nwe'wenisa yã'tja'w atsa' quimva ma'jīmeena sūjrra ewmée yũunuwe, wejyva Dyus cusete selpisaatja'w sūjna ew yũuwa'jrrá's yajcyna mfi'nzewe. <sup>17</sup>Jyucaysa yacj ewrráa mfi'nzewe, yacjtjē'jwe'shtyi peeygājna, jycaajsawe'shtyi nwēese'jna, Dyusnava tyã'wēy nwēese'jna.

### Cristova ma'wēga pcyuuni yuu tyã'wēy myuuwe

<sup>18</sup>Selpisaawe'sha' i'cue'sh patrontyi wala jypa'yacy nwēese'jna cytey myuuwe. I'cue'sh patron ewsarráaty tyã'wē yũumée, patron seena' juuna'satyva ewrráa myuuwe. <sup>19</sup>Quijva ājmée yũumeete Dyus yacj fi'nzepa'garráa patronwe'sh tyã'wē castigāyte', tyã'sa' ñuswa'ljme'. <sup>20</sup>Nava i'cue'sh ājmée yũute castigāyte', yuuwesatja'w naa pa'gaty castigāy sūjwa'jrrá'. Nava i'cue'sh ew yũupa'garráa ñuswa'lj ena's ji'pjute', Dyusa' peeygājana. <sup>21</sup>Tyã'wēte fi'nzecajncu Dyusa' pa'ya, i'cue'sh pa'gate Cristo' yuuwemeesarrava pytjaa yuuc tyãa na'wēy yuuwemeesarrava pcyuuni yuucajn. <sup>22</sup>Tyã' quīj pcal yujva yũume', sa' quim yujnava īshiime'. <sup>23</sup>Wēeshusatyi's caltuva wēeshuuna pasme'. Pcyusaatyi's tyã'wē yũupa'ga i'cue'shva ewmeete neeyũune'cue jīna pasme'. Tyã'wē yũumée wejyva Dyusrrāanac neewe'we. <sup>24</sup>Cue'sh pcaltyi's Cristoc cluuste uurra iviitu, cue'sha' peena' yu' pcalte fi'nzemée Dyus dyi'pte ewrráa fi'nzecajncu tyã'wē yũu. Cue'sh pcala' yaateni yuucajn yu' tyã' pcyuuni pytjaa yuu. <sup>25</sup>I'cue'sha' nyafīia' piisháa vitusa na'wē i'cue ũsu', nava āchja' Cristo tashte shawendi'cue, tyã' piisháa tjengsa na'wēc jype'je' i'cue'sh ũustyi.

### Ptamsa' na'wē fi'nzewa'ja'

**3** <sup>1</sup>U'ywe'sh iimi'sava, i'cue'sh nmi'ty cytey nwēese'jna mfi'nzewe. Tyã'wē yũute', i'cue'sh nmi' maáia' Dyus yuwe's wēsel'jya' wa'lsava

2 i'cue'sh ew fi'nzeni's uyrra', Dyusa's jiyuna pa'jatyna, Dyusa's mpaacue jina we'wemeeteva. 3 I'cue'sha' peecy cacue äacjêwe'shrrá's tyacue wala zhichcuesa qui'pna pjeu'jwa'j ji'pjmée i'cue, 4 wejyva ũuste tyā'wē zhichcue mpjeu'jwe, ew yūuwa'jrrá's yajcyna, vitesa yacj puiimée fi'nzewa'ja'srráa pacuena. Tyāarráa tjaacue ewsa' Dyus dyi'pte. 5 Nyaffi entey u'ywe'sha' tyāawe'sh ũustety tyā'wē zhichcue pjeu'ju' Dyusrráana neewe'wena tyāawe'sh nmi'ty nwēese'jna. 6 Sara' tyā'wēsac yu'. Abrahana's ũ'cue's jype'jsa' jīnac nwēese'je', atsa' i'cue'shva tyāa na'wēysa yuune'cue, tyā'wēy ew nwēese'jrra yu', äjmeetj yūu sūjna ũucj yajcyna fi'nzemeene'cue.

7 Tyā'wēy nmi'we'shva i'cue'sh nyuu yacj jypa'yacy ewrráa mfi'nzewe, u'ya' wejycuē' chjāchjameecueta' tyāa pa'ga. Sa' tyā'wērráamée, i'cue'sh na'wēyrráa Dyus yacj fi'nzesata' tyāa pa'ga tyā'wē ew mfi'nzewe, Dyus yacj puuty we'weni' cyul yuucajmen.

### Ew yūupa'ga ñus cnaysáa

8 Jyucaysa i'cue'sha' ewrráa yūuna mfi'nzewe, vitesatyva teehsa na'wērraj peeygājna. Weech yajcymée zhichcue puuty we'wena yacjtjē'j pwe'sh na'wē mfi'nzewe. 9 Ewmée yūusa's ca'tuva tyā'wēy ewmée yūuwa'jme', sa' wēeshute', tyā'wēy ca'tuva wēeshuwa'jme', wejyva tyā'wē yūusatyi' ca'tu yu' ewrráa myūuwe. Tyā'wē ewrráa yūucajn írráac Dyusa' i'cue'shtyi pa'yarra tyacue wala ew yūu. 10 Tyā'wē yūuwa'ja's na'wēc pta'shi' Dyus librute:

Maava ewrráa wēt fi'nze wēerra',  
Peecy tjune's ewmée we'wecajmen jypa'yacyrra  
I'cue'sh yuweju īshiinuwe.

11 Ewmeejū tyuteerra, ewrráa yūuna  
Puiimée fi'nzewa'jrrá's pacuerra uu entepcach tyā'wē yuurráa  
fi'nzewa'ja'.

12 Tyāa pa'gatey Dyusa' jype'je'c ew yūusatyi',  
Sa' Dyusa's pacuen neewe'weni's wēse'je'c.  
Nava ewmée yūusatyi' tyā'wē yū'tsme' jī'c.

13 Bagachteva i'cue'sha' ewrráa yūutste', ¿quim tyā'wē ca'tu' ewmée yūucy? 14 Ew yūuna fi'nzepa'ga ñuswa'j en ji'pjurrava, wechana wētwe'trráa meswe. Quim yujtyva ũucjnuwe cuj yajcyna, 15 wejyva i'cue'sh ũuste jycaajsa Cristorrá's wechana mneewe'wewe. Na'wē i'cue'shtyi caapiya'jni's jii i'cue tyā'sna paapēysatyi's pasya' tjaamemée meswe bagachteva, sa' ũuscha we'wemée ewrráa mpaaswe. 16 Tyā'wē ew yūurra mfi'nzewe, i'cue'sh ũuste yuuwemeetja'w sūjwa'jrráa ũusutjecajn, cyaj Cristo yacj ew fi'nzesaty e'sga ewmée nuywe'wesawe'sha' tjaameetyna, tyā'wē i'cue'shtyi ewmée nuywe'werra'. 17 Wejyva ewmée yūurra ñus cnayupcachte, ew yūupa'ga ñus cnayni wejy ewa', Dyus yuu tyā'wē jytjāas yā'tje'.

<sup>18</sup> Cristova tyã'wëycu pytjaa yuurra uu, tee dyi'jrráa jyucaysa pa'gate. Tyã' ewshac yu', nava cue'sh ewmeesa pa'gate pytjaa yuuc Dyus tashte nuypa'jya'. Tyã' isa uuyujc cacue yu', nava üus yu' uume'. <sup>19</sup> Tyãasac u'j uusaawe'sh üus preesu üsu'ty cytee pta'shya'. <sup>20</sup> Tyãawe'sha' nyaffi Noé ente! nwëese'jsameety yu' Dyusa's. Tyãa ente! Noea' barco's pjeu'ju'tspcachja', Dyusa' wala yuj üytjascu tyãawe'shtyi' nwe'weya'. Nava ocho nasarráaty yu'ju nwe'wenisa yuu. <sup>21</sup> Noé ente yu'a' ächj yu'te ya'bautisa'itja'w ewmeejü jyucate tyuteeya' süjrra tyã'wëshac yu'. Nava bautismo' pcala's yaate'tsme', naasáa Dyus dyi'pte peena yu' pcalte fi'nzeyamée süjrrarráac ya'bautisäynisa yu'. Atsa' Jesucristo uurra qui' ityi yuunisa yuurráac cue'shtyi' nwe'we. <sup>22</sup> Ächja' tyã' cielun u'jrra Dyus pucate jycaajna üsa', atsa' tyã'sa' angeleswe'sh ma'wësave tyã'srrarráanaty nwëese'je'.

#### Selpiia' äjawa'ja's Dyus ma'wë üste' cytey yuuwa'ja'

**4** <sup>1-2</sup> Cristova ma'wëga tyajy cacuete acasa's jypa'gana pytjaa yuu, tyã'wëy i'cue'shva pytjaa yuuwa'jsatja'w süjna meswe, tyãa pa'gatey peecy cacuete ewmée yüuya' yaacyni pcala's nvijtrra, Dyus jytjaasnirrá's uu entepcach cytey yuuya' yaacypa'gac pytjaa yuuwa'j en pa'ja'. <sup>3</sup> Pcala's nwëese'jmée nvijt-ya'fi nyaffi entey wala yäl'jne'cue nwëese'j Dyusa's jiimeesawe'sh yacj ja'ndarra. Tyãa ensu' i'cue'sha' ewmée i'cue yüuna fi'nze peecy cacueju ewmée yüuya' yajcyna, tüuna, cu'jna, pcjaacjerra tundyna, Dyus ityimeesaty neewe'wena. <sup>4</sup> Tyã'wë yüusai'cue yu'. Nava ächja' i'cue'sha' peena yu' tyãawe'sh yacj tyã'wë iiméj seena' ewmée yüuna fi'nze'tsmeene'cue, tyãa pa'ga ne'ta i'cue'shtyi' ewmée nuywe'wena atse'. <sup>5</sup> Nava tyãawe'sha' Dyusna paswa'j jipjutyna, ityisa ma'ty yuu meerra uuniisa ma'ty yuu nava jyucaysaty paapëywa'j ente'. <sup>6</sup> Uusaawe'sh ma'ty yuu nava paapëy ente' cacue jipjsa na'wëyrráa paapëyni yuutyna. Atsa' uute' üus yu' Dyus na'wëyrráa ityi üscajncu tyã'wë pta'shni yuu. Tyã'wë yuuwa'jsate írráac uusaawe'shtyiva Dyus yuwe's pta'shni yuu tyãawe'sh uumeyna.

<sup>7</sup> Naa quiwe ptsuwa'j ena' utyaatsa'. Tyãa pa'ga i'cue'sha' wala jypa'yacy meswe, naasáa Dyus yacj yuurráa puuty we'wena mfi'nzewe. <sup>8</sup> Nava i'cue'sh pwe'sh puuty peeygáawa'ja's wejy jytjaacue mpa'pchuwe, tyãa pa'gatey peeygáanisa' pcal macuesanava jyuca caapeltuna'icj jic. <sup>9</sup> Yacjtjél'jwe'shtyi yat mpeequi'jwe wa'lmée. <sup>10</sup> Teechsa na'wërraj puuty ya'mpu'chwe, i'cue'sh selpiia' äjawa'ja's Dyus ma'wëne' üs tyã'sa' cytey yuuna. Dyusa's selpiwa'ja's nacue wala cuj jwend üsni yuuc tyã'sa' jypa'garra', ew caaselpi'jsa myuuwe. <sup>11</sup> Maafia' pta'shwa'j jipjrra', peecy üuste yaacyni's we'wemée Dyus we'wenirrá's pta'shwa'ja'. Maava vitety pu'chya' yaaquitsrra', Dyus macue cchjäachja'jana tyã's yu' jyuca cytey yuuwa'ja'. Quij yüutsrrava Dyusa's wechaawa'ja'srráa yajcyna tyã'wë

yūuwa'ja' Jesucristo's pi'cyrra, tyāa pa'gatey quījquījva jyuca Dyus jūirraráata' bagachteva nes yuuwa'jsa.

### Ñuswa'j en pa'tje wechana fi'nzewa'ja'

<sup>12</sup>Yacjtjē'jwe'sh, Cristo's nwēese'pja'ga ñuswa'j en pa'tje', fiy yuj yu'c sūjna cuj yaacynuwe, <sup>13</sup>wejyva Cristo na'wēy ñuswa'ja's ji'pjutstju sūjna wēt miijajcywe. Tyā'wē yūurra', tyajy quīi ente' wechaawa'ja's wala uyuune'cue. <sup>14</sup>Cristo yacj fi'nzepa'ga ajtsena wēeshute!, i'cue'sha' ñusmēe mweechawe, tyāa pa'gatey Dyus Espiritu' i'cue'sh ūuste ūsa' ñusmēe wechwecha caayaqui'jwa'jsa. Cristo' tyāawe'sh yaatsenic fi'nze', nava i'cue'sh yu' tyā'sa' wechana i'cue fi'nze!. <sup>15</sup>I'cue'sha' maa yujva ñus cnaywa'j ji'pjuwa'j ji'pjmēe i'cue, na'wē yūurra: nasa icjna, pesweena, ewmēe yūuna, īshiina yuwe csuusu'jna fi'nzena. Tyā'wē yūurra ñus cnaywa'j yu'sa' ji'pjunuwe, wala tjaampa'sa'. <sup>16</sup>Nava Cristo's selpiipa'ga ñuswa'j en ji'pjurra', tjaamewa'jme', wejyva Dyusa's wechana tuutje'jwa'ja'. <sup>17</sup>Tyā'wēme!, macue Dyus luuchte yujva ñuswa'j ena' tyāawe'sh yacj cjuē'ycu tacj na' āchj nmej ente' ¿ma'wē seena' tjaacue ñus yujcy Dyus yuwe's nwēese'jsamēe yacja'? <sup>18</sup>Dyus luuch yujva wala ñus cnayrra nwe'weni yuute!, pcalsa ewmeesa yu' ¿mtee yuuya' u'juetyqui? <sup>19</sup>Tyā'wē Dyus jytjāasnite ñuswa'j en ji'pjurra', ñusmēe fi'nzewa'ja' peecy ūustyi Dyus cusetete neewe'wena. Tyāac cue'shtyi taqui'j na' tyāa'fírraa nwe'wena.

### Dyus yacj fi'nzesaty yu'cypejni

**5** <sup>1</sup>Ancianowe'shtyi yu'cypejetstju, andyva tyāawe'sh na'wēysa fírráatj, sa' Cristo pytjaa yuuni'sva uysaatj, sa' tyāawe'sh na'wēy cieluteva ūswa'jsatj. <sup>2</sup>I'cue'sh cusetete neewe'weni ūsta' Dyus luuch tyāaty jypa'yacy miipe'jwe, piisháa-tjengsa na'wē. Sa' vyuu jypa'gawa'jrrá's yajcy na tyā'wē yūumēe, Dyus jytjāasnirrá's cytey myuuwe, wa'lmēe wechana ewrráa yūuna. <sup>3</sup>Sa' Dyus luuch i'cue'sh jype'jnity juuna' we'wenava jycaajwa'jme', cyaj i'cue'sh fi'nzeni's piyaatyna. <sup>4</sup>Tyā'wē yūurra', cue'shtyi jype'jsa jytjaacue jytujtjesa vyaate!, i'cue'sha' jypa'gane'cue peesni iiméj zhichcuesa's tyā' naa quiwega peesnisa ptsu'ty tyā'wēsa meeta!.

<sup>5</sup>Pitstacywe'shva tyā'wēy ancianowe'sh we'weni's cytey myuuwe. Jyucaysa puuty ya'nwēese'jna fi'nzewa'ja' iwejch yajcymēe. Tyā'wēme!, Dyusa' pu'chji'tsme' iwejch yaacysaty's, nava iwejch yaacysameetyi's peeygājnac pu'chji!.

<sup>6</sup>Tyā'wē yā'tje!, Dyusa's mwēese'jwe, tyajy cuseterraráa jyuca ya'ducjna, cyaj i'cue'sh tyā'wē yūunijū!, Dyusa' i'cue'shtyi' walasa vituna. <sup>7</sup>Tyāa pa'ga i'cue'shtyi quīj tjēysa vyaateva, tyā'sa' jyuca Dyus cuseterraráa manvjtwe, tyāa pa'gatey tyā' i'cue'shtyi tjengsa' naa pa'ga.

<sup>8</sup>I'cue'sha' jypa'yacy meswe. Tyã'wẽme!, i'cue'shtyi atsesa echtjê'ja' quimrráanava icjya' sũjna león na'wẽ seena' pembeena pacuena u'ju'.  
<sup>9</sup>Nava echtjê'ja's wej yujva nwẽese'jnuwe Dyusa's chjächja yajcyna, tyã pa'gately i'cue'shrráamée tyã'wẽ pytjaa ñusna ũsi'cue, yacjtjê'jwe'sh msuuwe'shva jyuca tyã'wẽrrarráa pytjaa yuuna ũsta'.  
<sup>10</sup>Nava i'cue'sh manz en pytjaa yuuniijũ!, Dyus quijteva jyuca pu'chsa' cchjächja'jana jypumbana shiingmée ew fi'nzewa'ja's pu'chna. Tyã Dyusírráac cue'shtyi pa'ya, Jesucristo yacj bagachte yujva psumée ũswa'tje.  
<sup>11</sup>Tyã pa'ga bagachteva tyã's yuurráana wechaaga.

### Yuwe wechaa caajnyity pta'shna fi'jni

<sup>12</sup>Naa carta's fi'jrra cajastju ew fi'nzesa yacjtjê'j Silvano yacj. Cyteea' jyu'jmecuetj yu'cypeje!, na'wẽ Dyus pu'chni's jypa'gai'cue tyã' Dyusa' peeygãasa yujna sũjwa'ja's ew caajiyu'jsata!. Atsa' tyã'wẽ ũsutjeni's pechcanamée mfi'nzewe.

<sup>13</sup>I'cue'sh na'wẽy Dyus tyjityjnisa Babilonia quiwete ũsta' tyãawe'shva yuwe wechaa caja'ty, atsa' andy nchi'c na'wẽsa Marcosva yuwe wechaa caja'c.  
<sup>14</sup>Puuty pta'shna yuwe meen weechawe, teechna na'wẽrraj ya'peeygãjna.

Jesucristo's nwẽese'jsa i'cue'sh jyucaysa ewrráa mfi'nzewe.